

ՀՈԴՎԱԾՆԵՐ ԵՎ ՀԱՂՈՐԴՈՒՄՆԵՐ СТАТЬИ И СООБЩЕНИЯ

ՊԵՐՏԻ ԿՈՐԳԱՆՈՎԻ ՀԱՅ ՆՇԱՆԱՎՈՐ ԵՐԱԺՇՏԻ
ԿՅԱՆՔՆ ՈՒ ԳՈՐԾՐ

(Մանվան 100-ամյակի առթիվ)

Ա. Գ. ԹԱԳԵՎՈՍՅԱՆ

Գինարի Կորգանովը (Գինարիոս Ղորղանյան, 1858—1890) անցյալ դարի հայ երաժշտական արվեստի կարկառուն ներկայացուցիչներից մեկն է, որը թեև կարճատև կյանք է ունեցել, բայց աչքի է ընկել ստեղծագործական իր բազմակողմանի և արգասավոր գործունեությամբ: Կորգանովը հանդես է եկել որպես փայլուն դաշնակահար, ճանաչված կոմպոզիտոր, երաժշտական քննադատ և մանկավարժ, երաժշտահասարակական եռանդուն գործիչ, որ բացառիկ նախանձախնդրությամբ էր ծառայում հայրենի միջավայրում երաժշտական կյանքի աշխուժացմանը, երաժշտական գործի կազմակերպմանը:

Գինարի Կորգանովը ծնվել ու դաստիարակվել է ցարական բանակի գեներալ Հովսեփ Ղորղանյանի (Կորգանով) բազմաճյուղ ընտանիքում: Հայ գեներալի բոլոր վեց զավակներն էլ երաժիշտներ են դարձել. դուստրերը՝ Նունեն, Հեզդինեն և Մարիան՝ երգչուհիներ, երեք որդիներից՝ երկուսը՝ Հովհաննեսը և Կոստանդինը՝ երգիչներ, իսկ որդիներից ամենակրտսեղը՝ Գինարին, բազմաշնորհ երաժիշտ-դաշնակահար: Բացի Գինարիից իրենց արտիստական տաղանդով առանձնապես ճանաչված էին քույրերից՝ երկուսը՝ Նինա (Նունե) Կորղանով-Դարիալին և Իլենա (Հեզդինե) Տերյան-Կորգանովան, որոնք ժամանակին երգել են Ռուսաստանի և Եվրոպական օպերային տարբեր բեմերում, ինչպես նաև աչքի ընկել վոկալ մանկավարժության ասպարեզում ունեցած վաստակով:

Անցյալ դարի 60—70-ական թթ. Ղորղանյանների հարգված և հյուրընկալ տունը փաստորեն վերածվեց երաժշտական սալոնի, ուր պարբերաբար անցկացվող երաժշտական երեկոներին մշտապես հնչում էին արևմտաեվրոպական և ռուս դասական կոմպոզիտորների երկերը, ինչպես նաև ժամանակի առավել հետաքրքրական երաժշտական նորույթները: Այսպիսով, եռաժյուղական այդ նշանավոր ընտանիքը բավական նպաստավոր դեր էր կատարում Թիֆլիսի արվեստասերների միջավայրում, ճաշակ ու սեր պատվաստելով երաժշտարվեստի բազմատեսակ գանձերի նկատմամբ:

Գինարի Կորգանովը ծնվել է 1858 թ. ապրիլի 30-ին, Կվարելիում (Կախեթի): Դեռևս 4 տարեկանից նա սկսել է նվագել, զարմանալի թեթևությամբ արտաբերելով իր լսած երաժշտական մոտիվները: Գինարիի երաժշտական ընդունակությունների զարգացմանը վաղ տարիներին հետևում էին ավագ քույրերը, իսկ 1867-ից նրա դասատուն է դառնում Թիֆլիսում հաստատված հայտնի դաշնակահար-մանկավարժ է. Էպտեյնը (Ի. Մոշելիսի սանը), որը մեծ ուղադրություն և օգնք է նվիրում խոստումնալից երեխայի պարապմունքներին, արտակարգ բարձր գնահատելով նրա երաժշտական-կատարողական տվյալները: Էպտեյնի մոտ Գինարիի ուսումնառությունը տևում է մինչև 1872 թ. իսկ այնուհետև նա մեկնում է Պետերբուրգ՝ շարունակելու իր պարապմունքները կոնսերվատորիայում: Այստեղ նա սովորել է երեք տա-

րի, ապա ուսումը շարունակել լայպցիգի կոնսերվատորիայում (1874—75 թթ.)։ Լայպցիգից Գինարին նորից վերադառնում է Պետերբուրգի կոնսերվատորիա, երաժշտական իր բարձրագույն կրթությունն ավարտելով հսուա մանկավարժ-երաժիշտներ Գ. Կրոսսի և Լ. Բրասսենի ղեկավարությամբ։ Ստանալով հիմնավոր երաժշտական կրթություն, Գ. Կորգանովը 1879-ին մեկնում է հայրենի քաղաք՝ Թիֆլիս, ուր և սկսվում է նրա ակտիվ գործունեությունը երաժշտական բազմազան ոլորտներում։

Գինարի Կորգանովը, ինչպես հայտնի է, ո՛չ հուշագրություններ է թողել, ո՛չ ինքնակենսագրություն, հրապարակի վրա համարյա չկան նաև նրա նամակները, ուստի Կորգանովի ուսման տարիներին, ինչպես և հետագա գործունեության մասին անհրաժեշտ տեղեկություններ ու տվյալներ քաղելու համար ստիպված դիմել ենք ժամանակակիցների հուշերին կամ էլ մամուլում գետնից բերված նյութերին։ Այդ առումով կարևոր աղբյուր է Կորգանովի վաղեմի ընկերոջ՝ կոմպոզիտոր Մ. Մ. Իպուլիտով-Իվանովի գիրքը, որ կոչվում է «Ռուս երաժշտության 50 տարին իմ հուշերում»։ Այստեղ Իպուլիտով-Իվանովը հաճախ է հիշում իր հայ ընկերոջ մասին։ Նա գրում է. «Ես կոնսերվատորիա եմ ընդունվել դաշնակահարներ Բետինգի, Ալիխանովի, Կորգանովի, Վինոգրադսկու և Բեննշի, ջութակահար Գորսկու, թավջութակահար Գլենի, տեսաբաններ Արենսկու և Կադաշենկոյի հետ միաժամանակ։ Հետագա տարիներին մեզ միացան նաև Սաֆոնովը, Տարտակովը, Զարուդ-նայան և Ֆ. Մ. Բլումենֆելդը»¹։

Երկուսն էլ արտակարգ շնորհալի երաժիշտներ՝ Կորգանովը և Իպուլիտով-Իվանովը դեռևս այն ժամանակվանից փոխադարձ նվիրվածությամբ են վերաբերվել միմյանց, սովորաբար միասին են հաճախել համերգներ, ինչպես և մասնակցել են ընտանեկան շատ հավաքույթների, որ կազմակերպվում էին տարբեր առիթներով։ Իպուլիտով-Իվանովից բացի կոնսերվատորիայում Կորգանովի մոտիկ ընկերներն էին նաև ջութակահար Կ. Գորսկին, դաշնակահար Լ. Բետինգը, որոնց հետագայում Իպուլիտով-Իվանովը, Կորգանովը և Ալիխանովը Թիֆլիս հրապարակախոսի, որ բավական տեական մի ժամանակամիջոցում նրանք աշխատում էին որպես երաժիշտ-կատարողներ և մանկավարժներ։

Վերհիշելով պետերբուրգյան ուսման տարիները, Իպուլիտով-Իվանովը գրում է. «Կոնսերվատորիայում վերջին տարիներին ես մտերմացա տաղանդավոր դաշնակահար և կոմպոզիտոր Գ. Օ. Կորգանովի հետ և մենք միասին հաճախ էինք լինում Զավրիենների հայ ընտանիքում, որոնց դուստրը սովորում էր կոնսերվատորիայում։ Նրանց մոտ նվագարկելու համար հաճախակի էին հավաքվում կոնսերվատորիայի դասընկերները և կովկասցի մի քանի ուսանողներ»²։

1895-ին լույս տեսած իր մի հոդվածում Իպուլիտով-Իվանովը ի միջի այլոց նշել է, որ հենց Գ. Կորգանովի շնորհիվ է նա մշտական շփման մեջ մտնում Պետերբուրգի ուսանողների կովկասյան համայնքի հետ։ «Այստեղ, — ասում է նա, — ինձ վիճակվեց առաջին անգամ ծանոթանալ կովկասյան մեղեդիների բնույթին և հմայքին, հենց այստեղ էլ իմ մեջ ծագեց Կովկաս այցելելու միտքը»³։

Կովկասցի ուսանողները և առաջին հերթին Իպուլիտով-Իվանովի մտերիմ դասընկերները շատ առիթներ են ունենում պատմելու Կովկասի մասին, մի երկրի, որ պոետական վսեմ ներշնչումների աղբյուր է եղել հանճարեղ կերպարներին համար։ Եվ այսպես, աստիճանաբար սկսում է աճել երիտասարդ ողու երաժշտի հետաքրքրությունը Կովկասի կյանքի ու բնաշխարհի հանդեպ։ «Իմ

¹ М. М. Ипполитов-Иванов. 50 лет русской музыки в моих воспоминаниях. М., 1934, с. 18.

² Նույն տեղում, էջ 23—24։

³ «Артист». СПб., книга I, 1895, № 45, с. 131.

բոլոր մտորումները,—մտաբերում է այնուհետև Իպոլիտով-Իվանովը,—ուղղված էին այն բանին, որ այցելեմ Կոմկաս՝ այդ հեքիաթային երկիրը... Դրան նաև նպաստում էին իմ բարեկամների՝ համալսարանի վրացի ուսանողներ Անդրոնիկովների և Կոնսեպտուորիայի հայ դասընկերների՝ դաշնակահար Ալիսանովի ու Կոմպոզիտոր Կորգանովի պատմածները, իմ այդ բարեկամները, ինչպես և Պետերբուրգի կոմկասյան ամբողջ գաղութը ինձ լիովին հմայեցին իրենց ջերմ ու սրտագին վերաբերմունքով»⁴։

Կոնսեպտուորիան ավարտելուց հետո, Ռուսական երաժշտական ընկերության գլխավոր դիրեկցիայի առաջարկով Իպոլիտով-Իվանովը 1882-ին Թիֆլիս է մեկնում՝ մշտապես աշխատելու։ Այդ ժամանակ Թիֆլիսում արդեն գոյություն ունեւր երաժշտական դպրոց, որ հիմնադրվել էր 1876-ին, ինչպես հայտնի է, մինչ դպրոցի կազմակերպումը Թիֆլիսում գործում էին Խ. Սավանելիի երգչախմբային անվճար դասընթացները։ Սավանելիի գործն ընդլայնելու նպատակով շուտով նրան են միանում իր ընկերները՝ Կ. Ալիսանովն ու Ա. Միդանդարին, և երգչախմբային դասընթացների փոխարեն, այդ երեք երաժիշտների համատեղ ջանքերի շնորհիվ, երաժշտական դպրոց է բացվում։ Դա առաջին պրոֆեսիոնալ երաժշտական դպրոցն էր ամբողջ Անդրկովկասում։ Այստեղ երգչախմբային դասարանը վարում էր Խ. Սավանելին, դաշնամուրայինը՝ Կ. Ալիսանովը և Ա. Միդանդարին, իսկ 1880-ից՝ նաև Գ. Կորգանովը։ Այսպիսով, Իպոլիտով-Իվանովի Թիֆլիս ժամանելու պահին (1882-ի հոկտեմբեր) դպրոցն արդեն 6 տարվա պատմություն ունեւր։

«Ես Թիֆլիս ժամանեցի,— հիշում է Իպոլիտով-Իվանովը,—ուշ երեկոյան և տեղավորվեցի «Կոմկաս» հյուրանոցում... Առավոտյան գնացի փրնտրելու իմ բարեկամներին, և առաջին հերթին Գ. Օ. Կորգանովին, որի հետ ես ավելի սերտ մտերմական հարաբերությունների մեջ էի, քան Կ. Մ. Ալիսանովի։ Հանդիպելով, մենք միասին մշակեցինք մեր հետագա անելիքները՝ ժրգիւրը, դիտեցինք քաղաքը, հետո էլ եղանք երաժշտական դպրոցում... Կորգանովին հանդիպելուց հետո, նույն օրը այցելեցի Կ. Մ. Ալիսանովին, որն այն ժամանակ դպրոցի գլխավոր ղեկավարն էր, և նրան պաշտոնապես հանձնեցի Ռուսական երաժշտական ընկերության գլխավոր դիրեկցիայի առաջարկությունը՝ Թիֆլիսում երաժշտական ընկերության բաժանմունք բացելու վերաբերյալ»⁵։

Իպոլիտով-Իվանովի Թիֆլիսում հաստատվելը բավական աշխուժացնում է քաղաքի երաժշտական կյանքը։ Նրա նախաձեռնած առաջին գործերից մեկը 1882-ի նոյեմբերի 5-ի սիմֆոնիկ համերգն էր (այն նվիրված էր է. Էյզենտեյնի երաժշտական գործունեության 35-ամյակին)։ Սիմֆոնիկ համերգին մասնակցել են Գ. Կորգանովը, Ե. Գարսեանովան և օպերային թատրոնի սիմֆոնիկ նվագախումբը՝ Մ. Մ. Իպոլիտով-Իվանովի ղեկավարությամբ։ Դրանով իսկ սկսվում է Թիֆլիսի երաժշտական կյանքի ընդհանուր ինտենսիվացումը։



⁴ «Советская музыка», 1933, № 3, с. 151.

⁵ М. М. Ипполитов-Иванов. 50 лет..., с. 41—43.

Երաժշտական դպրոցը 1884-ին վերածվում է ուսումնարանի՝ միջնակարգ ուսումնական հաստատության, ենթարկվելով Ռուսական երաժշտական ընկերության Թիֆլիսի նորաստեղծ բաժանմունքին։ 1884-ի սեպտեմբերից, Թիֆլիսի ուսական օպերայում, որ շուրս տարի էր, ինչ կազմակերպվել էր, որպես գլխավոր դիրիժոր է հրավիրվում նույն Մ. Մ. Իպոլիտով-Իվանովը։ Թիֆլիսի ուսական օպերան 1882-ից աշխատում էր Իվ. Ս. Փիթոկի (Փիթոկյանի) ղեկավարությամբ։ Իր ձեռքը վերցնելով օպերային խումբը, Փիթոկը ձգտում էր աշխուժացնել թատրոնի երկացանկը և այս գործում առանձնապես մեծ նախաձեռնություն էր հանդես բերում Իպոլիտով-Իվանովը՝ Թատրոնի գլխավոր դիրիժորը։ Ընդհանրապես, Թիֆլիսում երաժշտական կարևոր բարեփոխումների ակտիվ ու համողված կողմնակիցներն ու կիրառողներն էին, բացի Իպոլիտով-Իվանովից, Գ. Կորգանովը, Կ. Ալիխանովը, Ա. Միղանդարին, Խ. Սափյանելին, Վ. Ջարուղնյան, Լ. Բետինգը, Կ. Գորսկին և ուրիշներ։

1886-ի ապրիլին առաջին անգամ Թիֆլիս է այցելում ռուս մեծահռչակ կոմպոզիտոր Պ. Ի. Չայկովսկին։ Այդ առթիվ օպերային թատրոնը վերաբեմադրում է «Մազեպան»։ Բացի այդ, նախապատրաստվում է նրա երկերին նվիրված սիմֆոնիկ մեծ համերգ, որ տեղի է ունենում ապրիլի 19-ին՝ կոմպոզիտորի ներկայությամբ։ Լսարանը համերգի սկզբին Չայկովսկուն արտակարգ սիրալիկ է դիմավորում, անվերջանալի օվացիաներով։ Ռուսական երաժշտական ընկերության Թիֆլիսի բաժանմունքի և երաժշտական ուսումնարանի անունից հանձարեղ կոմպոզիտորին ողջունի սրտագին խոսք է ասում Կ. Մ. Ալիխանովը։ Համերգին մասնակցում են օպերային նվագախումբը և երգչախումբը՝ Իպոլիտով-Իվանովի ղեկավարությամբ, իսկ որպես մենակատարներ հանդես են գալիս դաշնակահար Գ. Կորգանովը, երգչուհի Վ. Ջարուղնյան (սոպրանո), երգիչ Պ. Լոգին (տենոր), ջութակահար Կ. Գորսկին։ Գ. Կորգանովը համերգում կատարում է Չայկովսկու դաշնամուրային ստեղծագործությունները՝ նոկտյուրնը (F dur) և սկերցոն (h moll)։ Բացի այդ, Կորգանովը մամուլում գետնադրում է նաև «Մազեպայի» վերաբեմադրությանը նվիրված գրախոսություն, ջերմորեն գնահատելով Չայկովսկու և այդ հիանալի օպերայի կատարումը Թիֆլիսի բեմում⁶։

Չայկովսկին իր այցելության կապակցությամբ 1886-ի ապրիլին ֆոն Մեկկին ուղարկած իր նամակում գրել է. «Թիֆլիսում են ապրում մի քանի լավ, ականավոր երաժիշտներ։ Նրանցից առանձնանում են տաղանդավոր կոմպոզիտոր Իպոլիտով-Իվանովը և Գևնարի Կորգանովը՝ հայ դաշնակահար, Պետերբուրգի կոնսերվատորիայի նախկին ուսանող։ Նրանք ինձ ցույց են տալիս ամենայն ուշադրություն, և թեպետ ես կնախընտրեի ինկոգնիտո մնալ այստեղ, բայց չեմ կարող չզգացվել իմ նկատմամբ արվեստակիցների ունեցած համակրության և սիրո արտահայտությունից։ Ընդհանրապես, ես չէի սպասում, որ Թիֆլիսում իմ երաժշտությունը այդքան լավ գիտեն։ Այստեղ իմ օպերաներն ավելի շատ են նվագում, քան որևէ այլ տեղ, և առանձնապես «Մազեպան» մեծ հաջողություն ունի»⁷։

Երկրորդ անգամ Չայկովսկին Թիֆլիս է ժամանում հաջորդ տարվա մայիսի 30-ին։ Նա մինչև հունիսի 10-ը մնում է Թիֆլիսում և ապա մեկնում Բորժոմ՝ հանգստանալու։ Չայկովսկու Թիֆլիսում գտնվելու ժամանակ Իպոլիտով-Իվանովը բացակայում էր քաղաքից։ Ինչպես Չայկովսկու նախորդ այցելության օրերին, այս անգամ նույնպես Գ. Կորգանովն անշափ մտահոգվում է, որպեսզի մեծ կոմպոզիտորի օրերը Թիֆլիսում արդյունավետ ու հաճելի անցնեն։ Չայկովսկուն նախ և առաջ հետաքրքրում է Իպոլիտով-Իվանովի նոր օպերան՝ «Ռուֆը», որ 1887-ի հունվարին բեմ էր հանվել Թիֆլիսում։

Այդ մասին է պատմում Գևնարի Կորգանովի՝ Իպոլիտով-Իվանովին

⁶ Sd'v «Кавказ», 27 апреля 1886.

⁷ П. И. Чайковский. Переписка с Н. Ф. фон Мекк. Т. III, М.—Л., 1936, с. 413.

հասցեագրած անտիպ նամակը, որ վերջերս մեզ հաղորդեց հայտնաբերել Գրականության և արվեստի կենտրոնական պետական արխիվում (ЦГАЛИ): Այն գրված է 1887-ի հունիսի 24-ին:

Կորգանովն այս նամակում Իպոլիտով-Իվանովին ուրախալի լուր է հայտնում այն մասին, որ Չայկովսկին «հիացած է «Ռուֆի» երաժշտությու- նից»:

Նամակն ուղարկավ է նախ և առաջ նրանով, որ փաստական նոր նյութ է տալիս մեզ հայ երաժշտի՝ Չայկովսկու հետ ունեցած հանդիպումների մա- սին: Ինչպես պարզ երևում է նրա շարադրանքից, Չայկովսկին բացառիկ ուղարկություն է նվիրել Իպոլիտով-Իվանովի ստեղծագործությանը, հետևել երիտասարդ կոմպոզիտորի նոր հղացումների խրականացմանը, սրտանց խրա- խուսելով նրա ստեղծագործական աշխատանքի արդյունքները: Չայկովսկու հեղինակավոր կարծիքը «Ռուֆի» երաժշտության մասին, որ Կորգա- նովը հաղորդել է Իպոլիտով-Իվանովին, անշուշտ, երիտասարդ հեղի- նակի համար շատ էական նշանակություն ուներ, քանի որ Իպոլիտով- Իվանովին վստահություն էր ներշնչում իր ուժերի նկատմամբ, քաջաբերում նրա ստեղծագործական նախաձեռնությունը: Վերջապես, նամակը մի ավե- լորդ անգամ վկայում է, թե որքան սերտ մտերմությամբ են միմյանց հետ կապված եղել Կորգանովը և Իպոլիտով-Իվանովը: Նամակի շարունակության մեջ Կորգանովը պատմում է նաև իր գործերից. «Ամբողջ օրը նստած եմ տա- նը,— գրում է նա,— շատ եմ հորինում: Նախերգանքի փորձադրումը պատ- րաստ է մինչև Allegro-ն: Ենթադրում եմ մնացածն ավարտել Բորժոմում, ուր կմեկնեմ հուլիսի 19-ին, այսինքն քրոջս արտասահման ֆալսուց հետո»:

Կորգանովը երաժշտական ասպարեզում բազմակողմանի հետաքրքրություն- ներ ուներ: Աչքի ընկնելով աշխույժ բնավորությամբ, նա երբեք չէր կտրվում երաժշտական եռուգեռից, չէր մեկուսանում շրջապատից: Թիֆլիսի երաժշ- տական առօրյայում իրականացվող քիչ թե շատ նշանակալից ամեն մի նոր քայլ դժվար էր պատկերացնել առանց Գ. Կորգանովի մասնակցության: Նա սիրահոգաբար մասնակցում էր բարեգործական նպատակով տրվող տարբեռ տիպի համերգներին, երեկոներին, գիտակցելով դրանց հասարակական մեծ նշանակությունը: Ընդհանրապես նրա բնավորությունը շրջապատին առինք- նում էր սրտամոտությամբ և բարեսրտությամբ, մարդկանց նկատմամբ կա- րեկից ու անկաշառ վերաբերմունքով, արժանիքներ, որոնք մեծացնում էին նրա բարի համբավը: Իր նվագով, կատարողական բառձր արվեստով նա սիր- ված էր ամենուրեք: Նրա ելույթները մշտապես խանդավառ ընդունելություն էին արժանանում: Ժամանակակիցները նշել են Գինարիի նվագի հազվա- գյուտ ներգործող ուժը, մասնավորապես նրա այն բացառիկ ձիրքը, որի շնոր- հիվ դաշնամուրը դառնում էր պարզապես «խոսուն գործիք»: Գինարիի կրոա- սեր ժամանակակցի՝ հայտնի երաժշտագետ Վասիլ Կորգանովի վկայությամբ՝ «նա կարողանում էր զարմանալի վարպետությամբ հաղորդել կատարվող ստեղծագործության ոգին»⁸:

Մամուլը բազմիցս նշել է նրա դաշնամուրային նվագի նուրբ հնչողու- թյունը՝ գեղեցիկ տուշին, որով նա գունավորում էր հնչյունը, նվագին հաղոր- դելով արտահայտչորեն վառ ու քնքուշ հնչերանգներ: Իր նվագում նույնպիսի հմտությամբ նա կարողանում էր օգտվել նաև արտահայտչության այնպիսի հնարներից, ինչպիսիք են դինամիկայի ազդիկ կարգի միջոցները:

Կորգանովը առիթներ շատ է ունեցել շարադրելու իր հայացքները երաժշտական արվեստի տարբեր հարցերի մասին: Նրա ասույթներն արտա-

⁸ Կորգանովի նամակի տողերից պարզ չէ, թե ինչ նախերգանքի մասին է նրա խոսքը: Դա կարող էր լինել ըստ Վ. Հյուգոյի սյուժեի իր սկսած «Մարիոն դը Լորմ» օպերայի նա- խերգանքը:

⁹ В. Д. Кортанов. Кавказская музыка. Тифлис, 1908, с. 69.

հայտում են ժամանակի երաժշտական առաջադիմական միտումները, սերտորեն առնչվում ռեալիստական երաժշտության նոր սկզբունքներին:

Իր ստեղծագործական և կատարողական գործունեությանը հուզելից Կորգանովը հանդես է եկել որպես երաժշտական քննադատ՝ աշխատակցել է Ռիֆլիսում լույս տեսնող «Кавказ» թերթին: Նրա գրախոսությունները գրեթե ամբողջովին վերաբերում են օպերային թատրոնի բեմադրություններին և կարևորագույն համերգներին: Այդ գրախոսություններում բավական հստակ են արտացոլված Կորգանովի էսթետիկական ըմբռումները, նրա գեղարվեստական ճաշակն ու առաջադիմական դիրքորոշումը երաժշտական շարժման կարևոր հարցերում:

Ամենից սուղ նշենք, որ Կորգանովը մամուլում հետևողականորեն պաշտպանել է օպերային դասական երաժշտության նմուշները մշտապես պրոպագանդելու անհրաժեշտությունը: Միաժամանակ նա քննադատել է XIX դարի 30—40-ական թթ. իտալական որոշ օպերաներում նկատվող շտամպը, երաժշտադրամատուցիական շաբլոնը, գերապատվություն տալով ռեալիստական օպերային երաժշտությանը: Հետևելով Ռիֆլիսի օպերային թատրոնի խաղացանկին, Կորգանովն իրավացիորեն նկատել է. «Ինչը մեզ անհասկանալի է մնում՝ դա «Ռուսլան» և «Լյուդմիլա» բացակայությունն է խաղացանկում: Պարոն Փիթոկի մեջ մենք գտվելի ձգտում ենք նկատել՝ Ռիֆլիսի հասարակությանը ծանոթացնել դասական արվեստի լավագույն ստեղծագործություններին և մեզ առավել ևս տարօրինակ է թվում «Ռուսլանի»՝ ռուս երաժշտության այդ հիմնաքարի բացակայությունը այն ժամանակ, երբ նույն այդ խաղացանկում կան այնպիսի օպերաներ, ինչպիսիք են Շելի «Թամարան» և Սոլովյովի «Կորդիլիան»: Ռուս երաժշտության շահերը ամենևին էլ չէին տուժի, եթե այդ երկուսի փոխարեն լինեին միայն «Ռուսլան»¹⁰:

Մի այլ անգամ՝ «Իվան Սուսանինի» ստեղծման 50-ամյակի առթիվ, 1886-ի նոյեմբերի 27-ին Կորգանովը հանդես է եկել մի հոդվածով, ուր բավական հանգամանորեն խոսում է Գլինկայի առաջին օպերայի հազվագյուտ արժանիքների մասին, այն համարելով զարագույն կազմող երևույթ ռուս օպերային գրականության մեջ: «Դարեր կանցեն, — գրում է այնտեղ Կորգանովը, — իսկ օպերայի ինտրոդուկցիան և «В дурю, в прозу» խմբերգը, լեհերի հետ Սուսանինի տեսարանը (անտառում), «Փառաբանվիր» ֆինալը անթառամ կմնան որպես օպերային ստեղծագործության գլուխգործոցներ»:

Ինչպես ասացինք, Կորգանովի գրախոսություններում անցյալ դարի առաջին կեսի իտալական առաձին օպերաների նկատմամբ քննադատական վերաբերմունք է արտահայտված: Այդպիսի քննադատությամբ նա կարծես արձագանքում էր Չայկովսկուն և ռուս հեղինակավոր այլ երաժիշտների, որոնք չէին հանդուրժում այն շաբլոնն ու հնասովորությունը, որ արմատացել էր իտալական օպերային երաժշտության որոշ ստեղծագործություններում:

Կորգանովը Չայկովսկու երկրպագուներից էր: Նա հիանալի գիտեր Չայկովսկու ամենալավագույն երկերից մեկի՝ դաշնամուրային առաջին կոնցերտի մասին, Կորգանովն իր մի գրախոսության մեջ այսպես է գրել. «Համերգի ծրագիրը հաջող էր կազմված: Հենց միայն Չայկովսկու դաշնամուրային կոնցերտը հսկայական հետաքրքրություն էր ներկայացնում, մանավանդ, որ այն Ռիֆլիսում առաջին անգամ է կատարվում: Չայկովսկու առաջին դաշնամուրային կոնցերտը նշանավոր տեղ է գրավում ոչ միայն մեծատաղանդ կոմպոզիտորի երկերի, այլև ամբողջ դաշնամուրային գրականության մեջ, մի բան, որ, ի դեպ, ընդունում են նույնիսկ Չայկովսկու հակառակորդները: Լսելով այդ կոնցերտը, չգիտես թե ավելի շատ ինչի՞ վրա զարմանաս՝ թեմատիկ հնարամտության հարստության, նմանը չունեցող գործիքավորման, կամ թե ֆանտաստիկ կոլորիտի, որով երանգավորված է այդ ամբողջ ստեղծագործությունը: Կոնցերտի երեք մասերն էլ այնքան գեղեցիկ են,

¹⁰ «Кавказ», 2 сентября 1886.

այնքան հետաքրքիր, որ նույնիսկ դժվար է նրանցից որեէ մեկը նախընտրել: Կատարողի համար Չայկովսկու կոնցերտը վիթխարի դժվարություններ է պարունակում թե՛ տեխնիկական և թե՛ ֆրազավորման սեփականության Դաշնակահարուհի Կալինովսկայան այս ստեղծագործության կատարման ընթացքում ամբողջ փայլով ներկայացրեց իր մեծ տաղանդը»¹¹:

Կորգանովը մի այլ գրախոսության մեջ աններելի մեղանշում է համարել Չայկովսկու «Նվագենի Օնեգին» օպերայում լենսկու արիայի կատարման ժամանակ թույլ տրված ինքնահնարանքները:

Ժամանակին Կորգանովը գրախոսել է Թիֆլիսի օպերային թատրոնի մի շարք ներկայացումներ, այդ թվում՝ «Նվագենի Օնեգինը», «Օրլեանի կույսը», «Դևը», «Կարմենը», «Աիդան», «Սևիլյան սափրիչը», «Նորման» և այլն:

Կորգանովի գրախոսությունները վկայում են, որ նրան միշտ էլ ուրախացրել է ինչպես այս կամ այն նոր բեմադրության, այնպես էլ առանձին արտիստների հաջողությունը: Բայց և քիչ չեն գրախոսի քննադատական դիտողությունները, որ նա արել է օպերային ներկայացումների գեղարվեստական մեկնաբանման մեջ երաժշտական-բեմական կարգի թերությունները շտկելու րարի նպատակով: Նա ըստ արժանիւնի է գնահատել Թիֆլիսի օպերայի առաջատար ուժերին՝ նրանց ստեղծած լավագույն կերպարների համար:

Կորգանովի հավանությանն են արժանացել Պրյանիշնիկովի Դեր, Յակովլևի էսկամիլիոն և Օնեգինը, Մուլանովսկու Դոն Բազիլիոն, Կլյամովսկայայի Անտոնիդան և Միքայելան, Կամենսկայայի Ամենիսսե, Յեղար-Ինսարովայի Տատյանան և այլն: Դրա հետ միասին Կորգանովին չի բավարարել որոշ ներկայացումների գեղարվեստական մակարդակը: Իր գրախոսություններին մեկում նա բավական խիստ է արտահայտվում «Աֆրիկուհին» ներկայացման մասին, նշում է վերջինիս էական թերությունները, այդ հիման վրա եզրակացնելով, որ ընդհանուր առմամբ օպերայի բեմադրությունն փուլթ է¹²:

Գինարի Կորգանովը որպես երաժիշտ շատ խստապահանջ է եղել իր նկատմամբ և իր համերգային ելույթներին սովորաբար նա պատրաստվել է մեծ ջանասիրությամբ: Մեր նշած համերգներից բացի, տարբեր ժամանակ նա բազմաթիվ այլ ելույթներ է ունեցել ինչպես Թիֆլիսում, այնպես էլ Ռուսաստանի քաղաքներում: Դրանք մեծ մասամբ խառն համերգներ են եղել. որոնց, Կորգանովի հետ միասին, մասնակցել են գլխավորապես Թիֆլիսի ճանաչված երգիչներն ու երաժիշտները: Ստորև բերում ենք որոշ տվյալներ Կորգանովի համերգային ելույթների վերաբերյալ՝ օգտվելով ռուսական և հայ մամուլի թուղթիկ հաղորդումներից: Դրանք թեև շատ թերի են, բայց իբրև փաստական նյութ, անտարակույս, արժանի են ուշադրության:

1884, մարտի 9, Կորգանովի համերգը Թիֆլիսում, մասնակցությամբ Գորսկու, Լեիցկու, Ռյաբինինի, Տորիանիի և Մարտորետիի:

1884, նոյեմբերի 30, Թիֆլիս. Կորգանովի համերգը՝ մասնակցությամբ իր քրոջ՝ Ն. Տերյան-Կորգանովայի, Կ. Գորսկու և Պ. Օպոչինինի:

1885, մարտի 29, խառը համերգ Թիֆլիսում, մասնակցությամբ Բ. Կարա-Մուրզայի երգեցիկ խմբի, Գ. Կորգանովի, Կ. Գորսկու, Տեր-Ստեփանովի, Ռյաբինինի, Պախոմովի և Կոշևոյ-Լեիցկու:

1886, հունվարի 30. Ռուսական երաժշտական ընկերության Թիֆլիսի քաժանմունքի 5-րդ համերգ-հավաքույթը: Այստեղ Կորգանովը մասնակցել է Շումանի դաշնամուրային կվարտետի (Օր. 47) կատարմանը, հանդես գալով անսամբլի կազմում որպես դաշնակահար. համերգ-հավաքույթին մասնակցել են նաև երգչուհի Սմիռնովան և ջութակահար Գորսկին:

1886, ապրիլի սկզբին, Թիֆլիս. Կորգանովի և երգչուհի Բիչուրինայի համերգը:

¹¹ «Кавказ», 9 ноября 1886.

¹² «Кавказ», 13 июня 1886.

1886, մայիսի 10, Թիֆլիս. Գ. Կորգանովի, երգչուհի Ասլամագովայի և ջութակահար Նահապետյանի համերգը (այստեղ Կորգանովը կատարում է իր հեղինակած «Հայկական ռապսոդիան»):

1886, մայիսի 17, Թիֆլիս. Նինա Կորգանովա-Դարիալիի և Գինարի Կորգանովի համերգը՝ օպերային սիմֆոնիկ նվագախմբի մասնակցությամբ (դիրիժոր՝ Մ. Իպոլիտով-Իվանով):

1888, դեկտեմբերի 21. Ռուսական երաժշտական ընկերության Թիֆլիսի բաժանմունքի 20-րդ համերգ-հավաքույթը. ելույթ են ունեցել Գ. Կորգանովը, Վ. Զարուգնայան, Կ. Գորսկին և բաժանմունքի մշտական լարային կազմակերպիչները:

1889, մարտի 16, Մոսկվա. Ե. Տերյան-Կորգանովայի և Գ. Կորգանովի համերգը:

1890-ի փետրվարից Կորգանովը Կայսերական թատրոնի նախկին պրիմադեննա, երգչուհի է. Պավլովսկայայի հետ մեկտեղ Ռուսաստանի քաղաքներում համերգներ է տալիս: Այդ մասին նախապես հաղորդել է «Артист» հանգստի Նրանք լինում են Կիսլովոդսկում, Պյատիգորսկում, ապա այցելում Դոնի Ռոստով: Նույն այդ հանդեսում տպագրվել է նաև Ռոստովից ուղարկված հետևյալ հաղորդումը. «Մեծ պասի շրջանը մեզ մոտ, ինչպես և ամենուր, համերգներով սկսվեց: Առաջին նախաձեռնությունը՝ արեցին կայսերական թատրոնների արտիստներ Չեռնովը և Մարկովսկայան: Դրան հետևեց Կայսերական թատրոնի նախկին պրիմադեննա, երգչուհի Պավլովսկայայի, երգիչ Պավլովսկու և դաշնակահար Կորգանովի համերգը: Պավլովսկայայի երգեմունքի հիանալի ձայնը ժամանակի ազդեցությամբ անշուշտ տուժել է, և արտիստուհին, թեև հաջողությամբ ունեցավ, բայց ոչ այն հաջողությունը, որ նա ունեցել էր այստեղ, Ռոստովում՝ 8 տարի առաջ: Դաշնակահար Կորգանովին շատ ծափահարեցին՝ տաղանդավոր կերպով կատարած ստեղծագործությունների համար»¹³:

Երգչուհի Պավլովսկայայի հետ տված համերգների մասին գրել է նաև ինքը՝ Գ. Կորգանովը՝ եղբորը հասցեագրած վերջին նամակում. «Այսօր Պավլովսկայայի հետ մեր առաջին համերգն էր այստեղ, որ բավական լավ եկամուտ բերեց և հսկայական հաջողություն: Ես այնպիսի նյարդային վիճակի մեջ եմ, որ նույնիսկ քնել չեմ կարողանում: Առավոտյան գնում ենք Չերկասկ, ուր երեկոյան համերգ ենք տալու, իսկ այնուհետև կլինենք Նկատեմինոգարում, ապա Նորից Ռոստով, Տագանրոգ, Նարկով»¹⁴:

Վերին ասացինք, որ Գ. Կորգանովն անշափ սիրում էր Չայկովսկու ստեղծագործությունը և դրա հետ մեկտեղ, բացառիկ ակնածանք ունեւր նրա անձնավորության նկատմամբ: Հանճարեղ կոմպոզիտորի հետ երիտասարդ երաժշտի հանդիպումներն անշնչելի մնացին նրա հիշողության մեջ: Կորգանովը բախտ ունեցավ, բացի այդ, մոտիկից շփվելու նաև այնպիսի խոշորագույն երաժիշտների հետ, ինչպիսիք են Ա. Գ. Ռուբինշտեյնը, Ս. Ի. Տանենը: Վերջինիս մոտ Կորգանովն սկսել է կոմպոզիցիայի գծով պարապել 1889-ի սեպտեմբերից: Թե որքան հմայված էր Գինարին իր ուսուցչով, դա կարելի է տեսնել եղբորը գրած նրա նամակի հետևյալ տողերից: «Ես շատ եմ գոել և եռանդագին զբաղվել եմ խիստ ուժեղ կոմպոզիտորի կողմից ու XVI դարի եկեղեցական ոճով: Ս. Ի. Տանենը (որ այդ գործում հմուտ վարպետ է), Պ. Ի. Չայկովսկու հանձնարարականով, մեծ սիրով և, հասկանալի է՝ անվճար, պարապում է ինձ հետ: Տանենը մի այնպիսի սքանչելի մարդ է, որ չեմ կարող բառերով արտահայտել: Պատկերացրու, նա այնպես է սիրում իր գործը, որ չնայած իր բազմաթիվ պարապմունքներին, և շաբաթվա մեջ երկու անգամ նշանակված դասերին՝ երբ ես նրա մոտ էի գնում, նա հնար էր գտնում շաբաթվա ընթացքում նաև ինձ մոտ գալ և առանց մուշտակը հանելու 3—4

¹³ «Артист», СПб., 1890, № 7.

¹⁴ В. Д. Корганов. Кавказская музыка, с. 70.

ժամ պարապել ինձ հետ: Ես նրանից անսահման շնորհակալ եմ և շատ բանով նրան պարտական¹⁵:

Նույնպիսի հիացմունքով է արտահայտվում Կորգանովը Ա. Գ. Ռուբինշտեյնի մասին, մի մարդու, որ իր արվեստակիցներին ընդհանրապես բավական զուսպ է վերաբերվել և ժլատ է եղել խրախուսելու մեջ: «Ես չգիտեմ,— գրում է Կորգանովը Ռուբինշտեյնի մասին,— թե այլոց վրա ինչպես, բայց ինձ վրա իր անձնավորությամբ նա մեծ տպավորություն է գործում: Հարկավոր է արդյոք քեզ ասել, որ նա իր սիրալիրությամբ կախարդել է ինձ: Այնպիսի մարդ է նա, որ քաղաքավարությունից զրգված ինձ չէր հրավիրի իր մոտ և ընդհանրապես, եթե մեկին չի համակրում, ապա չի կարող դա ծածկել... Մշտապես ճաշի էր հրավիրում ինձ, քարշ տվեց կոնսերվատորիայի ներկայացմանը և ինձ էլ կողքը նստեցրեց, հետո միասին մեկնեցինք կովկասյան երեկույթին և այլն: Նա անձնապես ինձ համակրում է և խրախուսում իմ կոմպոզիտորական ընդունակությունները»¹⁶:

Կորգանովը խորապես գնահատում էր ժամանակի մեծ երաժիշտների բարեկամական ուշադրությունն իր նկատմամբ: Ի դեմս Կորգանովի նրանք տեսնում էին շնորհառատ և շատ խոստումնալից մի երաժշտի, միաժամանակ նկատելով նաև, որ ստեղծագործության ասպարեզում նա դեռևս կատարելագործվելու կարիք ունի:

Եվ ահա, ինքնակատարելագործման տենչով խանդավառված՝ երիտասարդ կոմպոզիտորը թողեց հայրենի քաղաքը, Մոսկվա մեկնեց և դարձավ Տանեևի աշակերտը:

Այժմ արդեն՝ Թիֆլիսյան տարիների անհոգությունից սթափված՝ նա իրեն երջանիկ էր զգում, որ վերջապես գտել է մի նոր ճանապարհ, որ իսկական տքնությամբ նա պիտի հարթեր իր համար:

Բայց երիտասարդի հանդեպ ճակատագիրը չափազանց անողորմ գտնվեց: Կորգանովը հանկարծամահ եղավ 1890-ի մարտի 9-ին, Դոնի Ռոստովի կայարանում՝ իր հերթական համերգը Եկատերինոդարում անցկացնելուց հետո: Նրա այս համերգային ուղևորության ծրագրում նշված էր նաև համերգ նոր Նախիջևանի իր հայրենակիցների համար, որտեղ նա երկու տարի առաջ նվագել էր, ունենալով բացառիկ հաջողություն: Այս անգամ, հայրենակիցները, մասնավորապես Թատերասիրաց ընկերությունը, նախօրոք պատրաստել էին արծաթյա ոսկեջրած շքեղ մի պսակ՝ իրենց սիրելի հայրենակցին մատուցելու մտադրությամբ, որի վրա փորագրված էր հատկապես այս սպասվող հանդիպման առիթով Ռաֆայել Պատկանյանի հորինած հետևյալ քառատող-ներբողը.

Դու մեր հոգին հրճեցուցիր

Նրկնապարզ և թեթև

և հայրենի գարդարեցիր.

արդ պսակվի՝ մեր ձեռքով¹⁷:

Ավաղ, բաղձալի այդ հանդիպումը չկայացավ և պատրաստված պսակը Գինարիի դագաղի հետ ուղարկվեց Թիֆլիս, ուր Գինարին թաղվեց Խոջիվանքի գերեզմանոցում: Կորգանովի մահը ցնցեց հայ հասարակությանը, մասնավորապես նրա արվեստի երկրպագուներին: «Մարտի 18-ին,— գրում է «Մշակը»,— Խոջիվանքի գերեզմանատանը տեղի ունեցավ Գ. Ղորղանյանի թաղումը: Թեև այդ օրը հղանակը շատ անախորժ էր և ցուրտ քամի էր փչում, այնուամենայնիվ, գերեզմանոցում հավաքվել էր հանգուցյալի տաղանդը հարգողների մի ահագին բազմություն»¹⁸: Հայ արվեստասերները, ինչպես նշել է Արծա-

¹⁵ Նույն տեղում, էջ 71:

¹⁶ Նույն տեղում, էջ 71:

¹⁷ «Մշակ», 1890, № 30:

¹⁸ «Մշակ», 1890, № 32:

դասերը», «աղի արցունքով ու այրված սրտով» հողին հանձնեցին իրենց սիրելի հրաժշտին, որի հետ այնքան սպասելիքներ էին կապում:

«Մեր հայրենակից, երիտասարդ, նշանավոր տաղանդներից մեկը այլևս չկա այսօր,— դրել է «Արձագանքը»: Մենդավայրից հեռու, օտար քաղաքում, «հայրենի կտուրի տակից» հեռացած, ազգական-բարեկամների բաժանված՝ դու, սիրելի Գեներալ, փչում ես քո վերջին շունչը:

Մոտ 15 տարի շարունակ դու աշխույժով շունչ ու կենդանություն տվեցիր մեզ համար անխոս գործիքներին: Մեզանից ո՞վ չէր ճանաչում նրան՝ ոչ միայն որպես հրաժիշտ-հորինողի, այլև որպես քաջամուտ նվագող դաշնակահարի, որի նրբությամբ զարնող մատների տակ դաշնամուրը ասես լեղու էր առնում և բարբառում մեր ականջին իբրև խոսող մի գործիք:

Թիֆլիսի նշանավոր սազանդարների հոգերն ու հրաժշտությունը, անշուշտ, իրենց ազդեցությունն ունեցան նրա վրա՝ հիշեցնելով իր ծննդավայր երկրի եղանակները: Մեզ ծանոթ արևելյան մեղեդիները, որ ուշադրություն դարձրեցին ու վարպետի ականջով էր լսում մեր տաղանդավոր հրաժիշտը, միևր ու գազափար տվին նրան իր գործունեության մեջ: Դրա ապացույցը կարող են լինել վաղամեծիկ հրաժշտի մանավանդ հին ու նոր բայաթիները, որ արդեն ժողովրդականացել են գրեթե ամբողջ Ռուսաստանում¹⁹:

Կորգանովի անժամանակ մահվան լուրը խոր վշտով ընդունեցին ոչ միայն նրա հայրենակիցները, այլև ռուս արվեստակիցներն ու բարեկամները:

«Գեներալի Կորգանովի մահը,—դրել է Չայկովսկին Իպոլիտով-Իվանովին,—ինձ շատ, շատ վշտացրեց: Նշույլով այդ կճատը գարշելի է ընդհանրապես, բայց երբ նա մարդուն հաղթում է իր ուժերի ծաղկման պահին,—ես էփան առանձնապես եմ ատում: Համատում եմ, որ Գեներալայի մահը ռեզ վրա առանձնապես ծանր պիտի ազդեր: Ի դեմս նրա դու կորցրիր հավատարիմ և նվիրված բարեկամին»²⁰:

Վաղամեծիկ սիրելի ընկերոջ՝ Գ. Կորգանովի հիշատակին Իպոլիտով-Իվանովը նվիրեց իր լավագույն սիմֆոնիկ ստեղծագործություններից մեկը՝ «Հայկական ռապսոդիան»՝ գրված 1894—95 թթ:

Գ. Կորգանովի ստեղծագործությունների մի զգալի մասը ժամանակին հրատարակվել է և բավական հաճախ է կատարվել: Առանձնապես տարածված էին նրա ռոմանսները, որ գլխավորապես հրատարակվում էին Պետերբուրգում՝ Բիտոսների և Մոսկվայում՝ Գուտիխի կողմից:

1904 թ. ռուսերեն թարգմանաբար լույս. ընծայված «Երաժշտական բառարանը», որի հեղինակն է Գուգո Ռիմանը, Կորգանովի կյանքի և ստեղծագործության փնտրելու արժանի գեղեցիկ, Կորգանովին ներկայացնելով որպես տաղանդավոր դաշնակահար և կոմպոզիտոր: Բառարանում հաստատված էին հայ կոմպոզիտորի մեղեդիկ ռոմանսները, դաշնամուրային առաքեսները, ակվարելները:

Կորգանովի ռոմանսներին է անդրադարձել նաև ռուս ականավոր հրաժշտագետ Ն. Ֆինդելզենը՝ ռուս գեղարվեստական երգին նվիրված իր աշխատության մեջ, որ Կորգանովը բնութագրված է որպես տաղանդավոր ռոմանսիստ: Բայց այստեղ Ֆինդելզենը Կորգանովի ստեղծագործությունը դիտում է իբրև ռուս հրաժշտության երևույթ:

Նա գրել է. «Գեներալի Կորգանովին... ըստ տաղանդի և տեխնիկայի չի կարելի դասել մեր դիրքատանների շարքը»²¹: Ա. Ռուբինշտեյնը գնահատում էր երիտասարդ ստեղծագործողին՝ որպես Կովկասի տված առաջին կոմպոզիտորին (Կորգանովը բնիկ թիֆլիսցի է): Ցավալի է, որ կոմպոզիտորը այդքան վաղաժամ վախճանվեց,— նրա թողած երգերը հեղինակի անտարակու-

¹⁹ «Արձագանք», 1890, № 5, էջ 5:

²⁰ В. Д. Корганов. Чайковский на Кавказе. Ереван, 1940, с. 70.

²¹ Ֆինդելզենի խոսքն այստեղ այսպես կոչված ուշ շրջանի դիրքատանների մասին է. (Ն. Աֆանասև, Պ. Բուլխով, Ի. Դոնաուրով, Վ. Պասխալով, Գ. Լիշին և ուրիշներ):

սեյի տաղանդն են վկայում: Արտասահմանում և մեր կոնսերվատորիայում ուսումնառությունն իր կնիքն է դրել Կորգանովի ստեղծագործության բնույթի վրա, ուստի և արդարացի կլինե՞ր նրան դատել «պահպանողական» ուսման սխառների խմբին: Կորգանովի լավագույն ուսմանսանների թվին են պատկանում ժողովրդականություն վայելող «Դոն-ժուանի սերենադը», «Դու ծնվել ես բոցավառելու համար», «Ինչի մասին» գիշերային լուսության մեջ» էլեգիան, «Սուր տապարով խոցված է կեշին» և այլն: Դրանց մեջ տրամադրություն կա, ըստ երաժշտության դրանք բոլորն էլ գեղեցիկ են և արտահայտիչ²²:

Ըստ Ֆինդեյզենի, ուսուսմանսային երաժշտության մեջ «պահպանողական» ուղղությունն են պատկանել Ա. Ռուբինշտեյնը, Կ. Դավիդովը, է. Նապրավնիկը: Ֆինդեյզենը նրանց է միացրել նաև Կորգանովին: Բայց եթե Ֆինդեյզենի հիշատակած առաջին երեք հեղինակները ուսուսմանսային ծնունդ են հղել, և որ ոչ պակաս կարևոր է՝ ապրել են իրենց ստեղծագործական լիակատար հասունությունը, ապա նույնը չի կարելի ասել Կորգանովի մասին: Կորգանովը, ինչպես գիտենք, չհաշված ուսումնառության տարիները, իր կյանքն անց է կացրել հայրենի միջավայրում՝ ամուր կապված մնալով անգրկովկասյան ժողովուրդների երաժշտական-մշակութային առօրյայի հետ: Ասենք և այն, որ Կորգանովը դեռ «չէր գտել իրեն», գեռ որոնումների մեջ էր, թեև գնալով մեծանում էր նրա միանգամայն բնական հետաքրքրությունը ազգային երաժշտական թեմատիկայի նկատմամբ: Էական այս հանգամանքը դժբախտաբար դուրս է մնացել Ֆինդեյզենի տեսադաշտից: Հիշեցնելով Ա. Ռուբինշտեյնի խոսքերն այն մասին, որ Կորգանովը Կովկասի տված առաջին պրոֆեսիոնալ կոմպոզիտորն է, Ֆինդեյզենը շրջանցել է Ռուբինշտեյնի ասույթի բուն նշանակությունը: Հնարավոր է, որ Ֆինդեյզենը Կորգանովի ուսմանսաններից բացի չգիտեր նրա մնացյալ երկերը: Մինչդեռ Կորգանովի ամբողջ ստեղծագործությանը ուշագիր հետևողը, անշուշտ, կնկատեր երիտասարդ հեղինակի որոշ գործերում արդեն նշմարվող ազգային ուրույն հատկանիշները, ճիշտ է՝ արտահայտված դեռևս թույլ և երկշտու: Հիշենք, օրինակ, «Պաղ աղբյուրի մոտ» հայկական երգի մշակումը, նրա դաշնամուրային գործերից «Բայաթիները», Կովկասյան և հայկական ռապսոդիաները: Անժխտելի փաստ է և խորապես նշանակալից, որ Կորգանովը հայ պրոֆեսիոնալ երաժշտության սկզբնավորման շրջանում ամենաառաջիններից մեկն էր, եթե ոչ առաջինը, որ իր ստեղծագործության մեջ օգտագործեց հայրենի ժողովրդական մեղեդիները:

Գենարի Կորգանովի ստեղծագործությունները աչքի են ընկել իսկապես բարձր պրոֆեսիոնալ արժանիքներով և պատահական չէ, որ արժանացել են ժամանակի ամենահեղինակավոր երաժիշտների ուշադրությանն ու գնահատությանը: Լինելով հմուտ երաժիշտ-դաշնակահար, նա խորապես ուսումնասիրել է ինչպես դասական, այնպես էլ ժամանակակից երաժշտական գրականության տարբեր ժանրերն ու ձևերը, նրանց կոմպոզիցիոն բնորոշ առանձնահատկությունները: Այդ են հավաստում նրա թե՛ դաշնամուրային երկերը և թե՛ ուսմանսանները: Տարբեր բնույթի նրա դաշնամուրային պիեսներին հատկանշական է հարմոնիկ շարադրանքի հստակությունը, ընտրված ֆակտուրային միջոցների գրավիչ բազմազանությունը, մեկուդիկայի ուրույն արտահայտչությունը և ձևակառուցման ամբողջականությունը: Այդ իմաստով հատկապես արժանի են ուշադրության կովկասյան և հայկական ռապսոդիաները, դաշնամուրային էտյուդներն ու արաբեսկները: Պատահական չէ, որ Կորգանովի դաշնամուրային էտյուդները, որ առանձնապես գրավիչ են իրենց բազմազան ու հնարամիտ ֆակտուրային միջոցներով, ժամանակին ընդունվել են լայպցիգի կոնսերվատորիայի կողմից՝ որպես ակադեմիական ծրա-

²² Н. Финдейзен. Русская художественная песня (романс), исторический очерк развития, СПб., 1905, с. 49.

գրով հանձնարարվող երկերու Հիշարժան են նուրմպես կորգանովյան «Արա-բեսկները» իրենց բնութագրական մեկուգիկայով։

Ինչ վերաբերում է նրա ռոմանսներին, ապա չի կարելի չընդունել, որ դրանք հարում են ռուս ռոմանսային լիրիկային և անտարակույս կրում են ռուս մեծ կոմպոզիտորների, մասնավորապես Ռիմսկի-Կորսակովի և Ջայկովսկու ազդեցությունը։ Կորգանովի ռոմանսներում պարզ երևում է նրանց մերձավորությունը ռուսական ռոմանսային լիրիկային, այդ լիրիկայի համար բնորոշ գեղարվեստական կերպարներին, տարբեր հոգեմիճակներ արտահայտող հուզական նուրբ տրամադրություններին։ Իր ռոմանսներում նա գլխավորապես դիմել է այն բանաստեղծներին, որոնց գրական տեքստերը ժամանակին արժանացել են Ջայկովսկու և Ռիմսկի-Կորսակովի ուշադրությանը։ Այդ բանաստեղծներից են Ա. Պուշկինը, Ա. Կ. Տոլստոյը, Մ. Մայկովը, Լ. Մեյր, Ա. Ֆետը, Ն. Շչեքրինյան և այլք։ Որոշ դեպքերում էլ Կորգանովը նույնիսկ վերստին դիմել է Ջայկովսկու և Ռիմսկի-Կորսակովի ռոմանսներում օգտագործված բանաստեղծական տեքստերին²³։ Կարևորն այն է, որ Կորգանովը հայ երաժշտության պատմության մեջ առաջինն անդրադարձավ ռուսական պոեզիայի սքանչելի կերպարներին, որոնք անկեղծորեն հուզել ու ստեղծագործորեն ներշնչել են երիտասարդ հայ հեղինակին։

Գինարի Կորգանովի ստեղծագործական ժառանգությունը շատ ճշգրիտ է բնութագրել հայ անվանի երաժշտագետ Ալեքսանդր Շահինբեկյանը։ «Կորգանովը,— գրել է նա,— դաշնամուրային և վոկալ ռոմանսային երաժշտության ոլորտում գործող արտակարգ շնորհալի կոմպոզիտոր էր։ Նրա «արևմտյան» ձգտումները (ռոմանտիկներին, առանձնապես Շումանի ոճի նկատմամբ ունեցած ստեղծագործական հետաքրքրությունը) սրբագրվել են Ռիմսկի-Կորսակովի և Ջայկովսկու երաժշտության դրական ազդեցությամբ։ Ազգային-ոճային իր որոնումների սահմանափակությամբ հանդերձ... Կորգանովը հայ երաժշտության մեջ մոռցն էր որոշակի և նշանակալից ավանդ, ամրացնելով նրա կապերը ռուսական հարուստ կուլտուրայի հետ։ Ռուս երաժշտության և արևմտյան ռոմանտիկների ժանրերը, ձևերն ու փորձը հայ երաժշտական կուլտուրայի ասպարեզը փոխադրելու նրա ձգտումը մի օրինալափ քայլ էր դեպի պրոֆեսիոնալիզմի հաստատումը, դեպի հայ երաժշտության ընդհանուր կուլտուրական մտահորիզոնի ընդլայնումը»²⁴։

Գ. Կորգանովը անցյալ դարի առաջին հայ պրոֆեսիոնալ երաժիշտներից էր, որն իր ստեղծագործական և կատարողական գործունեության մեջ լայնորեն հենվում էր ռուս և արևմտաեվրոպական երաժշտության փորձի և ավանդույթների վրա։ Իր արվեստով, իր ստեղծագործական հղացումներով նա ձգտում էր յուրովի արձագանքել ժամանակի ոգուն, նրա թելադրած գեղարվեստական նոր պահանջներին։

Կորգանովի ստեղծագործական կյանքը, որ անշափ վաղ ընդհատվեց, անտարակույս, նշանակալից եղավ հայ ազգային պրոֆեսիոնալ երաժշտության զարգացման, նրա նոր և կարևոր խնդիրների լուծման համար։

Նշելով Գ. Կորգանովի մահվան 100-ամյակը, մեր երաժշտական հասարակայնությունը իր խոր հարգանքի տուրքն է մատուցում նրա անուրանալի ստեղծագործական վաստակին։

²³ Այսպես, Կորգանովը օգտագործել է բանաստեղծական այն տեքստերը, որոնց հիման վրա է Ջայկովսկին ստեղծել իր «Դոն-ժուանի սերենադը» (Ա. Կ. Տոլստոյ), «Ինչպես թե՛ մոխրի վրա» (Ֆ. Տյուտչև), «Նոր հունական երգը» (Ա. Մայկով), իսկ Ռիմսկի-Կորսակովը՝ «Հարավային գիշերը» (Ն. Շչեքրինյան), «Ինչի մասին»՝ գիշերային լուսության մեջ» (Ա. Մայկով), «Հրեական երգը» (Լ. Մեյ) և այլն։

²⁴ Ա. Շահինբեկյան. Հայ երաժշտության պատմության ակնարկներ. Երևան, 1959, էջ 231—232։

ЖИЗНЬ И ДЕЯТЕЛЬНОСТЬ ВЫДАЮЩЕГОСЯ АРМЯНСКОГО МУЗЫКАНТА ГЕНАРИЯ КОРГАНОВА

(К 100-летию со дня смерти)

А. Г. ТАТЕВОСЯН

Резюме

Г. О. Корганов (1858—1890) — талантливый армянский пианист, композитор, музыкальный критик, педагог и общественный деятель второй половины XIX столетия. Родился он в семье генерала Овсена Корганяна (Корганова), в детские годы учился у известного педагога-музыканта Э. Эпштейна, затем продолжил учебу в Лейпцигской и Петербургской консерваториях. Превосходный музыкант, он с большим успехом выступал не только в родном Тифлисе, но и в других городах России. Его сочинения, в частности романсы, в 80-х годах XIX в. изданы нотопечатателями Гутхейлом (Москва) и Биттсром (Петербург). Популярны были его романсы — «Серенада Дон Жуана» (сл. А. К. Толстого), «Еврейская песня» (сл. Л. Мея), «Отрой секирой» (сл. А. К. Толстого), «О чем в тиши ночной» (сл. А. Майкова), «Южная ночь» и др. Среди инструментальных сочинений Корганова — Кавказская и Армянская рапсодии, фортепианные акварели, арабески, вальсы, мазурки, этюды (последние в свое время были приняты и рекомендованы учебной программой Лейпцигской консерватории). По окончании Петербургской консерватории Г. Корганов обосновался в родном Тифлисе, являясь одним из энергичных деятелей Тифлисского отделения Русского музыкального общества. Корганову выпало счастье не только близко общаться с такими композиторами как П. Чайковский, А. Рубинштейн, С. Танеев, но и пользоваться их благожелательной и дружеской поддержкой. По рекомендации Чайковского с 1889 г. Корганов брал уроки по композиции в Москве у С. Танеева. Внезапная кончина молодого музыканта после очередного концерта с глубокой скорбью была воспринята как соотечественниками, так и многочисленными русскими друзьями и почитателями. Похоронили Г. Корганова в Тифлисе. Г. О. Корганов один из первых профессионалов композиторов в армянской действительности, деятельность которого служила дальнейшему прогрессу национального музыкального искусства.